

En mertesc, ai 21.11.17 complësc **Zilia Alfarei** de Parüs **89** agn y **Walter Irsara** da Larzonei **80** agn, en jöbia, ai 23.11.17 **Elvira Trebo Miribung** da S. Linert **84** agn, en domënia, ai 26.11.2017 **Tarina Pitscheider Valentini** da Col D'Anví **81** agn. Le Senioreclub y düta la Comunité ti aoda düte le bun, sanité y benedisciun de Dî.

Le Comun de Badia lascia alsavëi che la domënia, ai 26 de novëmber, do mëssa grana, te Ciasa Runcher ti gnarál surandé al dirighënt dla müjiga Fridl Pescoller l'aodla d'or y le diplom d'onur. Düta la comunité é inviada a festejë cun nosc Fridl.


Atmosfera da Nadé ai Christkindlmärkte cun Taxi Vico en sabeda, ai 25 a Salzburg y en mertesc ai 28 de novëmber a Desproch. Por informaziuns/prenotaziuns: tel.: 335 6116528 o mail: info@taxivico.it

Stüdafüch de Badia - Control di destodadus: en sabeda ai 25 de novëmber dales 8:00 ales 12:00, pón condüje te magazin di Stüdafüch i destodadus (polver, scaia o CO²) por le control scrit dant dala lege. I stüdafüch y na dita spezialisada piará do i destodadus, che an podará jí a se tó do da ca. 1 ora. Chësc ne n'é nia ma n sorvisc di stüdafüch ala comunité mo ince n intervënt de prevenziun cuntra le medefüch!

KVW: jënt atëmpada y familiars é invia ala mostra por seniores **“wir 60+ gesund und aktiv”** en sabeda ai 25 de novëmber dales 9.30 ales 17.00 tla Ciasa M. Pacher a Bornech. Al é n bel program y tröc injins che podess ester de ütli tles abitaziuns cun jënt atëmpada (mosoraziun dl zücher, dla presciun, test ai ödli y ales orëdles ecc.). L' ingress é debann.

Aterteater “Die Engelphoniker”: teater por mitans y mituns dai 3 agn insö cun le duo de clowns Coco, en mercui, ai 22 de novëmber dales 16.00 a La Val tl salf dles manifestaziuns (por todësch).

“Les aventöres de Pinocchio - cuntia de n buratin”: l'Istitut Ladin inviëia düc ala presentaziun de chësc liber en mertesc, ai 21 de novëmber dales 17:00 tl Istitut Ladin a S. Martin.



Plata dla Ploania Badia San Iaco - San Linert

Ploan: **Siur Iaco Wendelin Willeit**
Calonia Badia: **0471/839571**
E-Mail: parrocchiabadia@libero.it
Radio dla Ploania: **91,10 Mhz**

UNITÉ PASTORALA



www.unitepastorala.org

Ann „A“ 19.11. - 26.11.2017 33^a Domënia dl ann n. 52

*Tö te pös dé zënza orëi bun,
mo ne te pös nia orëi bun,
zënza dé*



Vangele dla proscima domënia - Festa de Crist Re „A“ Mt. 25, 31-36, 40-43, 45-46

Te chël tēmp á Gejú dit a sù discipui: Canche le Fi dl Om vëgn te sù gloria y düc i agnui cun èl, se sentaral söl tron de sù gloria. Y düc i popui gnarà cherdá adöm dan da d'èl, y èl i cernará indalater, sciöche le famëi cern les bisces dai moc. Al abinará les bisces a sù man dërta, i moc indere a sù man ciampa. Dailó ti dijará le re a chi a sù man dërta:

Gnide ca, os benedis da mi Pere, tolede le règn, che é destiné por os dala creaziun dl monn incá. Deachi i â fan, y i m'ëis dé da mangé; i â sëi, y i m'ëis dé da bëre; i ê forest y zënza têt, y i m'ëis dé alberch; i ê desnü, y i m'ëis vistí; i ê amaré, y i sëis nüs a me ciafé; i ê te porjun, y i sëis gnüs da me. Amen, i ves diji: Vigni ota ch'i ëis fat chëstes cosses ince ma a un su de chisc mi mëndri fredesc, les ëise fat a me.

Spo s'ojarál ince pormez a chi a man ciampa y ti dijará: Demez da me, os maledis, tl füch etern, che é destiné por le malan y sù agnui. Deache i â fan, y os ne m'ëis nia dé da mangé; i â sëi, y os ne m'ëis nia dé da bëre; i ê forest y zënza têt, y os ne m'ëis nia dé alberch; i ê desnü, y os ne m'ëis nia vistí; i ê amaré y te porjun, y os ne sëis nia gnüs a me ciafé.

Vigni ota ch'i n'ëis nia fat chëstes cosses a un su de chisc mëndri, ne les ëise nia fates a me. Y ai s'un jará demez y ai ciafará le castighe etern, i iüsc indere la vita eterna.

FUNZIUNS SACRES

19.11. **33^a DOMÈNIA dl ANN – A / Domènia dla Caritas**

10.00 Mëssa por la Comunità
18.00 †to Emilio Costisella
por fam. Guido y Gilia Tavella
vis y †ti de Erica Canins en rengraz. a siur Videsott

• oferta por la Caritas •

21.11. Mertesc

19.30 †ti Teresa y Iosafat Pitscheider
†ti Angela y Milio Craffonara
por fam. Eduard y Nina Tavella

22.11. Mercui - **S. Zezilia / Mëssa cun i scolars dla elementara**

07.30 †to Erich Dapunt - aniversar
†ti Florino y Rosina Tavella
por fam. Walter y Resi Irsara en rengraz.

23.11. Jöbia - **Mëssa cun i studënc dla scora mesana y scores altes**

19.30 †ta Anna Piccolruaz ved. Piccolruaz
†ti Pitscheider da Oies
por fam. Crazzolaro/Pizzinini de Runch

24.11. Vëndres

19.30 **Mëssa dla Crusc Blanca** (ciantada dal cor Crusc Blanca)
†to Pasquale Irsara de Pescol - aniversar
†ti Paul, Afra y Rosina Declara
†ta Maria Irsara de Pescol

25.11. Sabeda – **S. Tarina**

16.00 Mëssa a Oies

26.11. **Festa de CRIST RE – Festa de S. Zezilia**

10.00 Mëssa ciantada por la Comunità
15.00 Zelebrazium dl Bato
16.30 **Prozesciun cun ciandëres a Oies**
17.00 **a Oies: Funziun cun le Vësko**

Degüna mëssa da sëra

Dala VITA dla CÜRA

Vijita Pastorala dl Vësko Ivo Muser



Cun l'edema vá la bela y rica vijita pastoral de nosc Vësko Ivo Muser tla „Unité pastoral Val Badia“ ala concluiun. Sperun che la bona somënza cresces inant cun de bogn früc spirituai. Chiló ciamó l'invit da tó pert ai ultimi dui apuntamënc, dandadöt ala Funziun de concluiun cun la prozesciun sö Oies:

Sabeda, ai 25 de novëmber dales 15:00 incuntada cun düc i colauradus y voluntars tles cüres cun le vësko te Ciasa Runcher.

Domènia, ai 26 de novëmber dales 17:00 stlujö dla vijita pastoral cun funziun sö Oies. Prozesciun cun les ciandëres dales 16:30 da Badia demez.

A düc chi che á tut pert y daidé para al garaté de chësta vijita pastoral n bel gran giulan y ldi s'l paies.

Siur Degan

Ministranc: al sará en lünesc, ai 20 de novëmber dales 20:00 te local di minis na sëra de incuntada cun i ministranc y sü geniturs.

Bibelrunde cun Siur Sepl Granruaz: se incuntun en mertesc ai 21 de novëmber dales 20.00 te colonia d'Al Plan (bass ite). Düc é inviá.

Caritas: en chësta domènia vëgnel partí fora jodapé de dljia na “plata” cun pinsiers dla Caritas.

Y dër bel giulan a chi che á porté i sac dal guant, chi che á daidé ciarié, mené inant y desciarié la racoiüda di sac.

Recordun che en vëndres, ai 24 de novëmber sará la mëssa da sëra dales 19:30 y en domènia, ai 26 de novëmber DEGÜNA mëssa da sëra.